

Papanublion ni Laura Kay

(Ilonggo Version)

R. B. THIEME. JR.

With permission of R. B. Thieme, Jr., Bible Ministries,
this publication is distributed in the Philippines
by Grace Logos Support Philippines, Inc.,
without charge or obligation.

For more information text or call:
(*Ginhatag pinaagi sa GLSP nga wala sing bayad ukon obligasyon.
Para sa dugang pa nga kasayuran mag-text ukon magtawag sa:*)
email: jersal1978@yahoo.com (Visayan)
Smart: 0920-218-3668 (Visayan)
email: naconasg@yahoo.com (Ilonggo)
Smart: 0970-034-3191 (Ilonggo)

The electronic version of this book can be read or downloaded
through the Internet address <https://www.gracelsp.ph>.
(*Ang sa electronic nga porma sang sini nga libro mahimong mabasa ukon ma-download
pinaagi sa internet address nga <https://www.gracelsp.ph>.)*)

Unang ginbantala subong *Laura Kay's Legacy*

© 1998 ni R. B. Thieme, Jr.

Ang tanan nga mga katungud ginreserba.

Ikaduhang impresyon 2003

Ini nga libro gin-andam pag-imprenta halin sa
mga panudlo kag wala nabantala nga mga
sinulat nga mensahe ni R. B. Thieme, Jr.

Ang Katalogo sang Pagtolon-an nga mga Pagtoon sa Bibliya
(sa English) igasangkap sa tion nga pangayoon, magpahibalo sa:
R. B. Thieme, Jr., Bible Ministries
P. O. Box 460829, Houston, Texas 77056–8829
www.rbthieme.org

Wala sang bahin sining bantalaan nga basi ginpahimo liwat ukon
ginpadala sa bisan ano man nga porma ukon sa bisan ano man nga
pamaagi, elektronika ukon minakina, lakip ang potograpiya, rekording,
ukon bisan ano man nga mga pahibalo nahanungud sa pagtipig kag
pamaagi sang pagkuha kag pagpadala, sang wala pagtugot paagi
sa sulat halin sa tagbantala.

Gin-imprenta sa Tagbilaran City, Bohol, Philippines, 2025

Ginbadbad kag gin-andam sa pagpaimprenta ni
Gloria Estanda Naconas
Ginrepaso nila Alma Avila Cachopero
kag Dante Mallorca Canja
Gin-imprenta nga may pagtugot sang
R. B. Thieme, Jr., Bible Ministries.

Papanublion ni Laura Kay

R. B. THIEME, JR.



R. B. THIEME, JR., BIBLE MINISTRIES
HOUSTON, TEXAS



*Pi Laura Kay nga ara sa idalum
sang grasya para sa tagumatayon, nga ginpinta
sang iya nagapalangga nga iloy.*

Papanublion ni Laura Kay

Ara ako nagatrabaho sa Air Force sa sina nga adlaw sang si Laura Kay Tapping natawo, 25 sang Septiyembre 1955. Subong nadestino nga malapit lamang sa Ellington Field, puwede ako makakadto sa St. Luke Hospital kag magpabilin didto sing pila ka tion sa pagpangamuyo para sa sining bag-ong anak nga babayi nga pirmi gid naluyagan ni Katie, ang iya iloy. Nakita ko ang bata sa tapos ako naghalad sang pangamuyo sa kuwarto sang iya iloy nga sa diin, syempre, napuno sang katawhan. Ayhan natingala sila kon ano ang akon ginahimo didto kag kon bala nagatrabaho ako sa Air Force ukon nagapastor—parehong ginahimo ko ining duha.

Sang nagligad ang kuwarentay-tres ka tuig sa amo gihapon nga hospital nagtindog ako sa kilid sang iya katre sa panahon sang ulihing mga tion niya diri sa sini nga kalibutan. Sanglit nga patay na siya, naghatag ini sa akon sang oportunidad para sa paghinumdum.

Nahinumduman ko ang nagligad nga mga panghitabo samtang nagapaminsar ako nahanungud kay Laura Kay—siya nangin isa ka tumalagsahong panghitabo sang grasya sang Dios: pagluwas nga grasya, buhi nga grasya, grasya para sa tagumatayon, walay katapusang grasya. Siya nasari subong may lawasnon kag pangkaisipan nga pagkabaldado, apang ang kasaysayan ni Laura Kay amo ang grasya sang Dios. Tilawan ko sa paghan-ay para sa inyo ang pila sang akon mga paminsaron agud nga mahangpan ninyo nga nagtililipon kita agud sa paghatag sang aton pagtahod sa kay Laura Kay Tapping. Sa pagkamatuud, Nagtililipon kita agud magselebrar sang kadaugan—ang kadaugan sang Ginoo, ang iya kadaugan.

Si Laura Kay nangin isa ka bata nga may dako kaa-yong pag-antos: may neurofibromatosis, kasakitan sa utok, mga kombulsyon, bulag ang isa ka mata, may scoliosis, kag sang interong listahan sang iban pa nga mga balatian. Ang patay na karon nga si Dr. Paul Harrington sang Houston amo ang nagkaput sang iya kahimtangan sang scoliosis. Nag-imbento siya sang operasyon—isa sa kinaunahan sang sini nga sari—sa diin gin-abrihan niya ini sa iya kag ginbutangan sang salsalon nga mga panukod sa iya karubkob. Sa sulud sang tatlo ka bulan ginakinahanglan nga si Laura Kay maghigda lamang kag indi gid maghulag. Nabrendahan ang iya lawas sang nagkadto ako agud makita siya didto sa hospital. Mabatian niya ang akon tingog samtang nagahambal ako sa nurse ukon sa tawo nga ara sa puwertahan, apang indi siya makaliso kag magtan-aw—ginakinahanglan niya magtan-aw sing tadlong sa ibabaw sang atop. Samtang nagalakat ako kag nagduko agud maghambal sa iya, yadtong matahum nga yuhum naggowa sa iya guya.

May ara siya sing tumalagsahon kaayo nga abilidad

pinaagi sa iya espirituhanong kinabuhi agud masarangan dumalahan ang kasakit. Bisan pa nga ara siya sa dako kaayong kasakit, kag bisan pa nga ini nangin isa ka dako kaayo nga pagtilaw para sa isa ka batan-on nga bata, nagyuhum siya sinang matahum nga yuhum kag nagpakig-estorya pa gid sa akon bag-o kami nagpangamuyo.

Sa sina nga okasyon, nabinagbinag ko nga si Laura Kay indi baldado; may lain lang siya nga kinabuhi sa iban. Ang iya pagkabata kag ang iya kinabuhi nga kuwarantay-tres ka tuig mangin pirmi gid lain. Ini mangin lain sa duha ka mga pamaagi: madamo kaayo nga pag-antos, apang sa amo man nga tinion amo ang pinakadako nga pag-antos ang akon nakit-an bisan kasan-o sa bug-os nga pag-antos. Gani, siya, dako gid kaayo nga inspirasyon sa madamo dira sa iya Kristohanong kinabuhi kag, sa subong sina, may mga abyan siya sa bug-os kalibutan. Sang ara sa hospital sa sining ulihi nga tinion, may mga nagatawag sa iya halin sa England, Katungdanong Africa, kag sa bug-os nga United States, kay ang iya kinabuhi nakatandog sa madamong katawhan.

Si Laura Kay nakahimo sang pinakadako nga desisyon sa iya kinabuhi—si Jesu-Kristo nangin iya Manluluwas. Ginhimo niya ina nga desisyon tungud kay nabatian niya ang Ebanghelyo sa sini nga simbahan. Nabatian niya kon paano si Jesu-Kristo ginhukman tungud sang iya mga sala kag kon paano Siya nagpalansang sa krus; Nabatian niya kon paano Siya gintrato sang mapintas sang wala pa Siya ginlansang sa krus; kon paano pinaagi sa pito ka mga paghusay sang pinakadungganong hukmanan sang Israel gintuis gihapon nila ang tagsa ka butang; kag sa sina didto man sa krus, ginpakahuy-an Siya sang relihiyosong katawhan. Dason ang kadudulman nagtabon sa kalibutan, kag ang bug-os nga mga

sala sa kasaysayan sang tawo ginpabangud sa perpekto, walay kasarang magpakasala nga tawhanong kinaiya ni Jesu-Kristo dira sa hypostatic nga paghiusa kag ginhukman sang Dios nga Amay, ang nagadumala nga Manughukum sang Korte Suprema sang Langit. Ang hypostatic nga paghiusa nagakahulugan nga si Jesu-Kristo isa ka walay katapusang Dios kag matuud nga pagkatawo sa isa ka Persona sa walay katubtuban. Sa iya pagkatawo, nagbaton Siya sang pagpabangud sang sini nga mga sala tungud kay may ara Siya sing tumalagsahon kaayong persona—ang sistema sang pagkamatinudanon nga gintawag dikinaugalingong gugma. Busa, ginbaton Niya ang pagpabangud sang kada sala sa kasaysayan sang tawo—halin sa orihinal nga sala ni Adan kag sang babayi tubtub sa kinaulihing sala sang Millennium—kag sa amo man nga tinion nagbaton sang paghukum para sa kada isa sa sini nga mga sala. Kag ginhimo Niya ini tungud sa gugma. Ara ang gugma sang Dios nga Amay nga nagtindog subong ang Manughukum. Ara ang gugma ni Jesu-Kristo, nga sa Iya tawhanong kinaiya naengganyo sang Iya gugma nga hukman tungud sang tagsa ka sala sa kasaysayan sang tawo, agud nga “ang bisan sin-o nga nagatoo sa Iya indi na gid mawala, kondi may kinabuhi nga walay katapusan.”

Si Laura Kay nakatalupangud nga may ara siya sang kinabuhi nga walay katapusan tungud kay kinaugalingon siya nga nagtoo sa kay Ginoong Jesu-Kristo paagi sa pagtoo lamang sa kay Kristo lamang. Siya nangin maayo gid kaayo nga pamatuud sang iya gugma sang wala nagakasayup nga Pulong sang Dios. Sang siya nagsugod na sa pag-antos—natilawan siya sa madamong indi ordinaryong mga pamaagi—naghimo siya

sang desisyon nga hangpon kon paano ginpahayag sang Dios ang Iya kaugalingon kag kon ano bala ang Iya ginasiling sa Balaan nga Kasulatan. Gani, ara gid siya sa kada posible nga tinion agud mamati sing panudlo sang Pulong sang Dios.

Sa tunga sa sining tanan, may dalagko nga pag-ataki sa iya, ang makahaladlok, malaut nga pag-ataki sang iya mga kaedad. Sa junior high kag sa high school ginhikayan siya, ginpahuy-an siya, ginbinuangan siya, gin-abuso siya, ginatilawan gid sang katawhan nga butongbutongon ang matahum nga buhok sa iya ulo. Ginakalingawan nila siya sa tagsa ka posible nga pamaagi. Ang pinakagrabe gid sa tanan ang natabo sa bus sa eskwelahan sa diin ginbinuangan nila siya, gintumba siya sa salog kag indi na siya makabangon. Nakapauli siya nga medyo indi makahangup sini kag nagahiribion. Apang may dako kaayo siya nga pagpaubus kag luyag mamati. Ang iya iloy, nga ara sa dako kaayo nga kinaalam, nagpaathag sa iya nga ini nga mga kabataan indi pa gid mga hamtong, nga may ara sila sing makasasala nga mga kinaiya, kag sa sina may ara sila kapintas sa pagsurusunlog sa tawo nga indi makabato sa bisan anong pamaagi. Gani, gingamit nila siya subong ila puntirya agud ipakita kon daw sa ano sila ka sikat kag daw ano ka maayo sila kag kon paano siya nangin natungdan lamang sang ila pagpanghikay. Ang iya iloy nagpaathag sini tanan nga mga butang agud nga makasugod siya sa paggamit sinang maayo kaayo nga espirituhanong kinabuhi.

Sa high school wala gid siya naglaktaw sang grado, apang naglaktaw siya sang henerasyon. Nangin hamtong siya. Ang iya iloy nagpaathag sa iya nga nagatoon siya sing temprano nga amo gid ini ang kinabuhi agud nga

masarangan niya batason ang kinabuhi kon ara na siya sa hamtong nga edad. Ginlaktawan niya ang iya mga kaedad kag nagaupod siya sa mga hamtong—nangin hanas-nga hamtong siya, nagustohan niya nga makau-pod ang mga hamtong, kag ako nangin abyan niya.

May mga pag-estoryahanay kami nahanungud sa madamong mga butang, kag nagsugod siya sa pag-atubang sini nga mga butang, Nagsugod na siya sa pagtuman sina nga palatukuran nga makit-an sa Pulong sang Dios.

Magtubo sa grasya kag sa ihibalo nahanungud sa aton Ginoo kag Manluluwas nga si Jesu-Kristo. (2 Pedro 3:18a)

Gintuman niya ina nga palatukuran sa pinakadakong posibilidad. Nauna siya sa iya mga kaedad. Sang ulihi nadiskubruhan niya nga ang iya mga kaedad nagahimo sa kada isa sang kon ano ang ila ginhimo sa iya sadto anay. Kon makit-an niya ini, pirmi gid siya makakadlaw, kay man may tumalagsahon siya nga karadlawon. Malambutan kami sing mga inoras sa pagpaathag sang mga pamaagi sang sistema sa diin may labing tumalagsahon kami nga pagkinadlawanay.

Kag may ara gid sang isa ka butang nga pirmi ko gindayaw—wala gid siya nagakalipat sang kamatuuran nga indi gid siya medyo kaangay sang iban nga katawhan. Kon kaisa kon ang iya mga utod nga lalaki nagkinagamo subong nga kasami matabo sa mga mag-ulutod—nakahimo sila sang pila ka sayup nga ila karon ginaantos—siya kasami nga nagasiling, “ako amo ang may diperensya sa utok!”

Nagtrabaho siya sa sulud sang byente-kuwatro ka

tuig sa bantalaan nga kabahin sang sini nga organisasyon—nga aton gintawag T & P, sa karon ini amo na ang R. B. Thieme, Jr., Bible Ministries—kag sa sulud sang byente-kuwatro ka tuig nadiskubrihan namon ang maayo kaayo nga butang. May madamo siya nga mga kahanasan! Nakasugod siya sa paghangup sang importansya sang oportunidad sa pagpadala sang Pulong sang Dios sa katawhan sa tanan nga duug. Nagapadala siya, sa kada oras, mga sobre nga may unud sang akon mga libro pakadto sa katawhan sa kada parte sang kalibutan sa diin may nagakinahanglan sa ila.

Didto sa India may pagkinahanglan sa makaisa, dason ang pagkinahanglan nabalhin sa Nigeria kag Africa, kag dason nagbalhin ini sa Germany kag Europe; ang pagkinahanglan nagbalhin sa nagkalainlain nga mga duug sa nagkalainlain nga mga tinion. Si Laura Kay pirmi gid may madamong tumpok nga trabaho nga ginakinahanglan matapos. Walay iban pa nga luyag maghimo sini. Ginadala niya ang iya trabaho sa balay, kag nagatrabaho didto, dason magbalik siya sa sunud nga aga nga may dala sing mabug-at nga bag nga puno sang sini nga mga butang. Ang katawhan nakasugod sa pagbinagbinag nga kon luyag nila magdalidali nahanungud sang isa ka butang, pangayoa kay Laura Kay. Nangin matutum siya, ginhimo niya ang iya trabaho suno didto sa Ginoo. Ginhigugma niya ang Ginoo kag ini nagpauswag pa gid sang iya maayo kaayo nga kapasidad sa paghigugma sang katawhan nga naghigugma man sa Ginoo. May ara kami sing tumalagsahon gid kaayo nga relasyon!

Gani, nagtipon kita sa sini nga adlaw, agud magselebrar sang kadaugan—ang kadaugan ni Laura Kay Tapping, nga amo ang kadaugan sang aton Ginoong Jesu Kristo.

Kay sa kada isa sa aton ang kinabuhi nagabitay sa isa ka mapino nga hilo. Ina nga hilo puwede mabugto sa bisan anong tinion kag wala gid sang bisan isa sa aton ang nakahibalo kon daw sa ano ka dugay kita magkinabuhi sa sining kinabuhi. Gani, ang pagpreparar na nga daan para sa kamatayon amo ang dapat mangin numero unong ulunahon. Kag kon ini amo ang numero unong ulunahon may ara isa lamang ka preparasyon—ang pagtoo lamang sa kay Kristo lamang.

Sa tapos ang kaluwasan ang ulunahon amo ang makadalayaw nga espirituhanong kinabuhi nga si Kristo ang Iya mismo kaugalingon nag-imbento kag naghatag sa aton. Pinasahi ini sa Panahon sang Simbahan kag hingpit ini nga tumalagsahon ka maayo. Agud mangin preparado sa kamatayon amo ang mangin preparado para sa sini nga kinabuhi kag sang kinabuhi sa tapos ang kamatayon—ang kinabuhi nga walay katapusan. Para kay Laura kay, sa mismong tion sang iya pagtoo sa kay Jesu-Kristo, nakabaton siya sang trentay-nuwebe ka indi mabawi nga mga kahingpitan, nga nagalakip sang kinabuhi nga walay katapusan. Kag nahangpan niya ini nga mga butang. O, medyo nadugayan man gid siya, pero nangin bulldog siya. Naglingkod siya sa lingkoran kag kon indi siya makahangup sang kon ano man ang gintudlo, indi siya magtindog kag maghalin kag magsiling, “wala ko nakahangup sini nga mga butang; makadto ko sa isa ka duug nga mahangpan ko ang isa ka butang.” Indi, nagbalikbalik siya liwat kag liwat kag liwat pa gid tubtub makahangup siya—tubtub nga naathagan. May ara siya sing labing tumalagsahon kaayo nga espirituhanong kinabuhi—wala gid makapareho sini, kag gani, nakahan-da siya tungud kay nahangpan niya nga agud mangin preparado para sa kamatayon nagkinahanglan sang

ihibalo—ang ihibalo nahanungud sang doktrina sang Bibliya.

Nangin tumuluo siya kag luyag niya mahibal-an ang tanan nahanungud sang espirituhanong kinabuhi. Ginatilawan man gani niya kon kaisa nga magsulat sang mga nota, apang mabudlay ini para sa iya. Indi siya makasulat sang medyo nagakaigong kadasig, apang makahambal siya sa iya iloy pagkatapos sina, makahambal siya sa akon, makapamangkot siya sang mga pamangkutanon. Nahibaloan niya ina kag gani indi lamang nga makasunud siya sa mga matutum nga mga sakup sang kongregasyon, kondi nga kasami malabwan pa niya sila. Nagaabante siya sa iya espirituhanong kinabuhi.

Sa panahon sang aton bug-os nga kinabuhi sa sini nga kalibutan, nagahimo kita sang madamong mga desisyon. Iban sadto amo ang maayo nga mga desisyon halin sa kahimtangan sang kabakod, kag ang iban amo ang malain nga mga desisyon halin sa kahimtangan sang mga kaluyahon. Apang samtang nagapadayon si Laura Kay sa sini nga kalibutan para sa iya kuwarantay-tres ka tuig, madamo pa gid kag madamo pa gid nga maayong mga desisyon ang naghalin sa kahimtangan sang kabakod. May ara siya dako kaayo nga espirituhanong kabakod sa Ginoo.

Nahibaloan niya kon diin siya pakadto. Kasami nga nagapakighambal siya sa iya iloy nahanungud sang iya lawas kag kon daw ano ka malaw-ay ini, apang wala gid siya nadulaan sing paglaum. Nakahibalo siya nga ini pagabaylohan sa tion sang pagkabanhaw, kag sa sina ara siya didto nga may maayo kaayo nga lawas—ang nabanhaw nga lawas, kaangay sang aton Ginoo.

Samtang nagtililipon kita diri karon nga adlaw agud maghatag sang aton ulihing pagtahod sa kay Laura Kay,

importante gid para sa aton nga mahangpan naton ang iya kadaugan labaw pa sa kamatayon. Ang Balaan nga Kasulatan nagasiling nga,

“O kamatayon, diin bala ang imo pagdaog? O kamatayon, diin bala ang imo sudlot?” Ang sudlot sang kamatayon amo ang sala, kag ang gahum sang sala amo ang kasugoan; apang salamat sa Dios, nga nagahatag sa aton sang pagdaog pinaagi sa aton Ginoong Jesu-Kristo. (1 Mga Taga-Corinto 15:55–57)

Si Laura Kay nakahangup sini, kag ginalauman ko nga ikaw man sa wala ka pa magbiya. Nakahangup siya nga ang Dios sa Iya perpektong kinaalam nagadesisyon sang tinion, sang pamaagi, kag sang duug sang kamatayon para sa kada isa nga nagahimo sinang pinakadakong desisyon sa kinabuhi—ang desisyon nga magtoo kay Jesu-Kristo. Nakahangup siya nga ang Dios may plano para sa iya kinabuhi, subong man sa tanang mga tumuluo ni Jesu-Kristo, kag nagasugod ini sa walay katapusang kaluwasan. Nagasugod ini sa sina nga palatukuran nga sa diin makit-an sa madamong beses sa Balaan nga Kasulatan.

Agud nga ang bisan sin-o nga magtoo kay Jesu-Kristo indi na gid mawala kondi may kinabuhi nga walay katapusan. (Juan 3:16b)

Si Laura Kay nagtoo sa kay Ginoong Jesu-Kristo.

Isa ka adlaw may pamangkutanon siya nahanungud sa dalanon sang Balaan nga Kasulatan kag, samtang nalambutan sang pila ka tinion, sa kadugayan nahangpan

niya nga ang dalanon may kaangtanan sa iya kinabuhi kag sang aton mga kinabuhi subong mga tumuluo. Ini nagasiling sa pagkamatuud,

Suno sa akon mahanuut nga paglaum [pagpaabot sang palaabuton] kag pagsalig [pasalig nahanungud sa palaabuton], nga indi ako mahuy-an sa bisan anong butang. (Mga Taga-Filipos 1:20a)

Mahinumduman niya ang kapanahonan sang iya kinabuhi sang nakabatyag siya sang kahuya sa pamaagi nga gintrato siya kag sa kon ano ang nakita niya sa espiho. Apang gulpi lang naglabay samtang nagsugod na siya sa pagtubo sa grasya. Nahangpan niya ang dalanon nga, “Indi ako mahuy-an sa bisan anong butang,” kag nakahibalo kon siya “mawala sa lawas, kag magaatubang sa Ginoo”—subong nga karon dira na siya—amo ina ang iya kadaugan.

Ini amo ang matuud sa kamatayon sang bisan sin-ong tumuluo. Ang kalag magabiya sa lawas kag magakadto sa presensya sang Ginoo. Amo ini ang gintawag nga “pagpauli” dira sa Ikaduhang Mga Taga-Corinto 5 kag ginlaragway sa ginhusto nga pagbadbad halin sa Griyego.

Mawala sa lawas, magaatubang sa Ginoo. (2 Mga Taga-Corinto 5:8b)

Nahangpan niya nga ina amo ang iya palaabuton, kag tungud kay nahangpan niya ina, nagsugod siya sa paghangup sang pulong nga “pagsalig.” Yadto nga bersikulo nangin iya pagsalig. Nahibal-an niya ina kag gintoohan ini sang ang Balaan nga Kasulatan nagasiling,

Suno sa akon mahanuut nga paglaum kag pagsalig, nga indi ako mahuy-an sa bisan anong butang, kondi sa bug-os nga pasalig, nga si Kristo bisan karon, subong sa gihapon, pagabayawon sa akon lawas, bisan sa kinabuhi ukon sa kamatayon. (Mga Taga-Filipos 1:20)

Ang iya lawas nag-antos sa neurofibromatosis kag, bisan pa sina, si Kristo pagabayawon sa iya lawas—“bisan kon sa kinabuhi ukon sa kamatayon”—kag amo ina ang importanteng butang. Mapagsik siya kag nakahangup sang “bisan kon sa kinabuhi,” kag gintalupangud niya ang pagkamatuud nga sa palaabuton ini man mangin “sa kamatayon.”

Nagatolok sa iya sang wala pa siya nagbiya agud makaupod ang Ginoo—nagatulog siya, indi na siya mabugtaw liwat—nagatolok sa iya sa sina nga tion, matahum siya kaayo. Ang iya buhok nahusay sang maayo kag may matahum nga pangyuhum sa iya goya. Makaistorya ko sa iya apang siya indi makaistorya sa akon tungud kay na-comatose siya. Hingpit gid nga tumalagsahon kaayo siya nga tulokon. May maayo kaayo siya nga katawhayan. Ginpinta siya sang iya iloy kag eksakto gid sa iya hitsura. Amo ina ang akon panan-aw sang nakita ko siya sa kinaulih nga tion.

Si Kristo bisan karon, subong man sa gihapon pagabayawon sa akon lawas, bisan kon sa kinabuhi ukon sa kamatayon. [Kag dason sa sunud nga bersikulo—ini amo ang nangin kinabuhi niya.] Kay para sa akon, ang pagkinabuhi amo si Kristo, kag ang

pagkapatay amo ang pagdaog. (Mga Taga-Filipos 1:20b–21)

Gani nagakinabuhi siya sang iya kinabuhi suno kay Ginoong Jesu-Kristo; siya nalikupan sang Persona ni Kristo. Ang tagsa ka butang nag-agi sa sina nga palaagihan—ang tanang pag-antos nga iya ginbatas, ang tanang grabe kaayo nga kasakit, kag bisan pa sina pirmi gid ara ina nga yuhum sa iya goya. Bisan ang pila ka mga doktor nga nakahibalo sang kasakit nakakita sang iya kaisog.

Kay para sa akon, ang pagkinabuhi amo si Kristo, kag ang pagkapatay amo ang pagdaog. (Mga Taga-Filipos 1:21)

Dira sa orihinal nga Griyego walay berbo, kag kon wala ang berbo amo ina ang ginatawag ta nga madramahon nga paglaktaw sa pagpakahulugan sang teksto sa sini nga dalanon. Ini dapat badbaron nga, “Kay para sa akon, ang pagkinabuhi . . . si Kristo, ang pagkapatay . . . pagdaog.” Sa sina nga pamaagi niya ini nahangpan sa sina nga pamaagi niya ini ginpakamahal. Gani, nakapauswag siya sang tumalagsahon kaayo nga gugma para sa aton Ginoong Jesu-Kristo—ang gugma para sa Dios. Ginsilingan kita dira sa Mga Taga-Roma nga nagapaathag sini sang iya kinabuhi.

Kay nahibaloan naton nga sa yadtong naga-higugma sa Dios, Iya ginahimo ang tanang mga butang nga magapanghikot para sa ikaayo [kag sila nagapanghikot para sa ikaayo sa iya kinabuhi], bisan sa yadtong mga

gintawag suno sa napat-ud na nga daan nga plano. (Mga Taga-Roma 8:28)

Nahibal-an niya nga ara siya sa sulud sang plano sang Dios. Nakilala niya ang pagkamatuud nga

Kon ang Dios apin sa aton, sin-o bala ang makapamatok sa aton? (Mga Taga-Roma 8:31*b*)

Nagkinabuhi siya sa idalum sa sini nga palatukuran. Nahibal-an niya nga ang Dios uyon sa iya kag sa sina amo nga wala gid sing makapamatok sa iya. Ang bug-os niya nga mga eksperyensya sadto anay nga naggrad-war siya sa high school, ang tanang mga butang nga ginhimo sang katawhan—ang kapintas sang mga pamatan-on—gintrato niya ini sing makadalayaw gid kaayo agud nga nangin isa ukon duha ka mga henerasyon nga nauna na siya sa ila. Naghamtong siya.

Siya nga wala gani nagpaiway sang Iya kaugalingon nga Anak, kondi nagtugyan sa Iya subong isa ka halili tungud sa aton nga tanan [si Jesu-Kristo nagtugyan subong halili tungud sa aton tanan—ang aton dako kaayo nga kaluwasan], paano bala nga indi man Siya [sa sini nga kaluwasan] maghatag sing hilway sa aton sang tanang mga butang? (Mga Taga-Roma 8:32)

Si Laura Kay isa ka benipisyaryo, ang manugbaton sadtong hilway nga ginhatag nga “tanang mga butang”—mga pakamaayo.

Hunahunaa nga, halimbawa, kon ano ang natabo didto sa hospital. Sang ulihi gintugotan nila siya nga magpauli. Ang tanan daw sa maayo lamang sa sina nga tion. Ang pagdugo sa utok nawala na kag gintugotan na siya nga magpauli.

Domingo sadto bag-o ang katapusan kag tumalag-sahon gid kaayo nga katapusan sang semana. Ginhimo niya ang tanang luyag niya. Ang iya iloy nagplano sang tanang butang para sa iya kag nangin maayo kaayo ini. Ginhimo niya ang tanang butang nga luyag niya himoon kag sa sinang Domingo sang aga—indi ko gid malipatan ini—sang gulpi lamang didto mismo sa puwertahan sa likod—pirmi gid siya nagalingkod mismo sa atubangan—naglakat siya sa tunga nga pasilyo! Nakibot ako sang nakita ko siya—nakabayong sang matahum, nagayuhum sang iya naandan nga yuhum, nag-abot siya kag naglingkod mismo sa iya lugar. Nagtindog ako dayon sa kon diin ako nagalingkod, bag-o nagsugod ang panimbahon, kag nanaog kag ginhalokan siya. Wala gid ako nagmalipayon kaayo nga makit-an siya subong sa sina nga tion. Iya ini bug-os nga nangin katapusan sang semana—ang tanang butang nga luyag niya himoon. Kag mangin interesado ka sa iban nga mga butang nga luyag niya himoon—sugiran ko kamo sang isa.

May isa ka tawo sa banwa nga ang ngalan Brad kag nagahimo siya sing pinakamanamit nga tinapay sa kalibutan nga may tsokolate. Bag-o siya magtulog makaon gid siya anay sang isa ka bilog nga tinapay nga may tsokolate ni Brad—amo ato ang ulihing butang nga iya nahimo. Dason natulugan siya kag nagbugtaw siya didto sa langit. Daw sa ano ka maayo kaayo nga katapusang adlaw sang semana—grasya sa pagkinabuhi, grasya para sa tagumatayon—May ara gid siya sini tanan.

Amo ina kon ngaa ang Balaan nga Kasulatan nagasiling,

“O kamatayon, diin bala ang imo pagdaog?
O kamatayon, diin bala ang imo sudlot?” Ang sudlot sang kamatayon amo ang sala, kag ang gahum sang sala amo ang kasugoan; apang salamat sa Dios, nga nagahatag sa aton sang pagdaog pinaagi sa aton Ginoong Jesu-Kristo. (1 Mga Taga-Corinto 15:55–57)

Ang Dios perpekto kag, gani, ang Iya plano perpekto. Ang tinion, ang pamaagi, kag ang duug sang aton kamatayon perpekto, pinaagi sa Iya disenyo. Indi ini nangin isa ka tion nga temprano kaayo kag indi man isa ka tion nga ulihi kaayo. Ang iya kamatayon nangin sa tinion sang Dios, kag ang tinion sang Dios amo lamang ang solo nga tinion—ang pinakamaayo nga tinion nga magkinabuhi kag ang pinakamaayo nga tinion sa pagbiya sa sini nga kinabuhi. Kag amo ina ang eksaktong natabo. Kay ang pagdaog nga iya naagum sa kamatayon amo ang bug-os nga parte sang gugma kag pagkamatinud-anon sang Dios.

Ang gugma kag pagkamatinud-anon sang Dios nagadala pabalik sa aton pakadto sa nagligad nga eternidad sa diin ang tatlo ka mga kinaugalian sang Dios—ang pagkamatarong sang Dios, ang katarungan sang Dios, ang gugma sang Dios—bug-os nga naghinangpanay agud magsangkap sang aton dako kaayo nga kaluwasan. Kon ano ang ginasaway sang pagkamatarong sang Dios sadtong nagligad nga eternidad—ang tanang mga sala sa kasaysayan sang tawo, ang katarungan sang Dios magahukum didto sa krus sa sini nga tinion, agud nga karon ang gugma sang Dios hilway sa pagsangkap sang

divine nga kasulbaran pinaagi sa grasya sang Dios.

Ang Dios nagapakita sang Iya kaugalingong gugma sa aton, nga samtang mga makasasala pa kita, si Kristo napatay subong isa ka halili tungud sa aton. (Mga Taga-Roma 5:8)

Kay tungud sa grasya naluwas kamo pinaagi sa pagtoo; kag indi sa inyo mga kaugalingon, ini amo ang dulot halin sa Dios; indi sa mga trabaho, basi ang bisan sin-o nga tawo magpabugal. (Mga Taga-Efeso 2:8–9)

Karon inang amo man nga pagkamatarong sang Dios nga nagasaway nagauyon man. Gani, kon ano ang ginauyonan sang pagkamatarong sang Dios, ang katarungan sang Dios nagapakamaayo kag nagapadala sina nga pakamaayo sa tawo. Ang pagkamatarong sang Dios nagakinahanglan para sa aton sang tama nga tinion agud magkinabuhi subong mga tumuluo, kag sang tama nga tinion agud mapatay subong mga tumuluo kag magkadto sa presensya sang Ginoo. Kag amo ina ang eksaktong natabo kay Laura Kay.

Ang pagkamatarong sang Dios nagkinahanglan sang tinion, sang pamaagi, kag sang duug sang iya kamatayon; ang katarungan sang Dios nagpatuman sina sa eksaktong tinion pinaagi sa gugma sang Dios, nga ginhatag paagi sa grasya sang Dios, agud nga ini mangin para kay Laura Kay Tapping. Ang pagdaog sang Dios—indi isa ka tawhanong pagdaog.

O kamatayon, diin *bala* ang imo sudlot? O lulubngan, diin *bala* ang imo pagdaog? Apang

salamat *gid* sa Dios, nga nagahatag sa aton sang pagdaog pinaagi sa aton Ginoong Jesu-Kristo. (1 Mga Taga-Corinto 15:55, 57, KJV)

Gani, may ara kita sing panublion nga indi madinulunton, kag walay dagta, kag wala nagakadula, natigana didto sa langit para sa imo, nga nabantayan sang gahum sang Dios pinaagi sa pagtoo nahanungud sa kaluwasan. (1 Pedro 1:4–5a)

Ang tumuluo ni Jesu-Kristo indi pahalinon sa sa sini nga kinabuhi luwas sa labaw nga kamandoang desisyon sang mahigugmaong Dios. Tubtub nga ang Dios nagahimo sina nga desisyon nahanungud sa tinion, sa pamaagi, kag sa duug sang aton kamatayon, walay tinuga, walay mga kahitaboan, walay kalisdanan sang bisan anong sari ang puwede makapahalin sang tumuluo ni Jesu-Kristo sa sini nga kinabuhi. Kag sanglit nga ang Dios nagdesisyon na sang tinion, sang pamaagi, kag sang duug sang kamatayon ni Laura Kay, ginakilala naton ini karon kag nagkadto diri agud magselebrar sini subong pagdaog sang Dios. Nagpili Siya sang tama nga tinion, sang tama nga pamaagi, sang tama nga duug.

Gani, ginakinahanglan naton hinumdumon nga walay instrumento sang kamatayon ang makapahalin sang bisan sin-o sa aton tubtub ang Dios nagatugot sini. Ayhan ang Dios wala nagatugot sang pagpahalin sa imo sa sini nga kinabuhi tungud kay wala ka pa nakahimo sang pinakadako sa tanang mga desisyon—ang desisyon nga magtoo kay Jesu-Kristo.

Kay ang nagatoo kay Jesu-Kristo indi gid

mapatay, kondi may kinabuhi nga walay katapusan. (Juan 3:16b)

Ayhan wala ka pa nakahimo sina nga desisyon kag ayhan wala ka man lang gani nakahangup sang harambalon. Ang harambalon ginpahayag sa madamong Balaan nga mga Kasulatan.

Ang nagatoo kay Jesu-Kristo wala ginahukman [walay Katapusang Paghukum]; apang ang wala nagatoo pagahukman, tungud kay wala siya nagtoo sa natawo sa pinasahi nga Anak sang Dios. (Juan 3:18)

Kay tungud sa grasya naluwas kamo pinaagi sa pagtoo; kag ina indi tungud sa inyo mga kaugalingon, ini dulot sang Dios; indi sang mga trabaho, basi ang bisan sin-o magpabugal. (Mga Taga-Efeso 2:8–9)

Para sa inyo nga ari diri karon nga nagakasubo, hinumdumi nga ang kinabuhi ginakinahanglan magpadayon sa pagkinabuhi, bisan pa kon may dakong pangasubo kag kasulub-on tungud sang kamatayon sang isa ka tawo nga ginapalangga gid sang tuman. Apang ang Dios nagsangkap sang pagpahalipay para sa tumuluo, sang kabakod agud magpadayon agud nga masarangan naton ang kasubo sa pamaagi nga mapasidunggan ang handumanan ni Laura Kay.

Gani, kita, ginhatagan sang gahum pinaagi sa nametabolisar nga doktrina sang Bibliya nga nagasirkular sa nagakinadina nga paminsaron indi sa pagpahuya sang aton pinalanggang patay sing aligutgot, pagkadalok,

pagkadimakatarunganon nga kasulub-on. Ang aton kasulub-on may dakong gugma kag pagkamalolo, apang walay aligutgot. Indi naton malipatan ang nagbiya na nga mga hinigugma nga nauna na sa aton didto sa langit. Bisan pa nga napuno kita sang kasubo kag pagkalolo, naton-an na naton nga kita, ang buhi, nagakinahanglan magpadayon sa pagkinabuhi sa sini nga kinabuhi. Ang Dios may katuyoan gihapon para sa aton kinabuhi ukon wala na kuntani kita diri.

Gani, ang aton kasulub-on kag ang aton kasubo mapunggan paagi sa pat-ud nga ihibalo nga para sa akon “ang pagkinabuhi amo si kristo, kag pagkapatay pagdagog.” Pinaagi sa aton kasubo ginadala naton ang kahamot sang mga handumanan, kag pinaagi sa sina nga kahamot indi na gid maglain ang aton buut sa kalipay kag indi man sa kaladlawon sang yadtong nagapadayon sa pagkinabuhi sang ila mga kinabuhi. Gani, importante gid kaayo nga mahinumduman naton ini nga mga palatukuran karon nga panahon. Amo ina ang luyag ni Laura Kay nga imo pagahimoon.

Wala siya sing bug-os nga paghangup samtang siya buhi pa, apang karon dira sa presensya sang Ginoo may ara na siya sing bug-os nga paghangup, kay karon mismo, si Laura Kay wala na sa lawas kag nag-atubang na sa Ginoo. Siya ara sa duug sang

Wala na sang kasubo, wala na sang mga paghibi, wala na sang kasakit, wala na sang kamatayon; ang daan nga mga butang nagtaliwan na tanan. (Bugna 21:4b)

Si Laura Kay kinahanglan pa magbangon kag maglakat kon kaisa para lang makakuha liwat sang pila ka

sirkulasyon sa iya lawas. Sang siya nagalakatlakat, kamsami siya makabati sang mainit nga diskusyon didto sa ginakomperensyahan nga kuwarto—nga ginatawag naton sa militar nga ‘ang tingog sang mga pusil.’ Si Laura Kay pirmi gid makabatyag sang tingog sang mga pusil. Nagasulud siya sa ginakomperensyahan nga kuwarto, kag may maayong masangkad gihapon ako nga pananaw—sa pagkamatuud nagluwas sa akon sa football—agud nga makita ko siya nga nagasulud. Nagtindog siya didto tubtub ang pag-aso sang kompetisyon maklaro na kag maglinong na ang wayang, kag dason ang tingog ni Laura Kay maggowa sa aso, “Apin kami ni Bob!”

Luyag ko nga mahibaloan ninyo ang akon kinaandan nga pangkompetisyon nangin halos perpekto, kag tungud sang grasya sang Dios, masiling ko nga, “Laura Kay, Laura Kay! Indi ko na gid mabatian liwat nga sambiton mo yadto nga mga pulong sa sini nga kinabuhi. Apang mabot ang panahon nga magkitaay kita liwat sa langit, kag kon magkitaay kita, sa presensya sang aton pareho nga Ginoo kag Manluluwas, makasiling na gid ako nga, ‘Kaapin ko si Laura kay! Kaapin ko si Laura Kay!’”

Sa pagduko sang aton mga ulo kag pagpiyong sang aton mga mata, ginahalad ta ang pangtapos nga mga tion sang sini nga selebrasyon sang pagdaog sa kay bisan sin-o nga sa sini nga kaagahon wala pa nakahimo sang pinakadako sa tanang mga desisyon—ang desisyon sa kinaugalingong pagtoo sa kay Ginoong Jasu-Kristo. Amo ini ang solo nga pamaagi nga makapanghinuyang sang eternidad—dira sa presensya sang Dios; amo ini ang solo nga ginhalinan sang pinakadako nga mga pakamaayo sa kinabuhi. “Ang bisan sin-o nga nagatoo kay Jesu-Kristo indi na gid mawala kondi may kinabuhi nga walay ka-

tapusan.”

Karon mismo, si Laura Kay ara na sa duug nga labi, labi pa gid ka maayo kay sa bisan anong butang diri sa kalibutan. Siya ara sa isa ka duug nga may dakong kalipay—wala na sang kasubo, wala na sang mga paghibi, wala na sang kasakit, wala na sang kamatayon, ang daan nga mga butang nagtaliwan na. Kag nahibaloan ko nga luyag niya himoon ko ini para sa inyo.

Sa pagduko sang inyo mga ulo kag sa pagpiyong sang inyo mga mata, may pagkapribado ka sa imo kalag, kag ina nga pagkapribado nagakahulugan nga may kahilwayan ka. Hilway ka dira mismo sa diin ka nagalingkod karon nga makaangkon kon ano ang ara kay Laura Kay—ang kinabuhi nga walay katapusan. Ini amo ang isa ka butang sang ordinaryong pagtoo sa kay Jesu-Kristo. “Kay ang bisan sin-o nga nagatoo sa kay Jesu-Kristo indi na gid mawala kondi may kinabuhi nga walay katapusan.” Karon mismo, puwede ka magporma sadtong mga pamulong, sa hunahuna lamang, sa hipos lamang, sa imo kalag kag isugid sa Dios nga Amay nga nagatoo ka kay Kristo, kag amo ina ang tion sang kinabuhi nga walay katapusan para sa imo. Amo ina ang imo prebilehiyo kag ang imo oportunidad nga makapakig-ambit sa kadaugan ni Laura Kay.

Kag gani mapasalamaton gid kami, Langitnon nga Amay, para sa pribelehiyo kag sa oportunidad sang paghinuyang sining pila ka mga tinon sa sini nga kaagahon agud kilalahon ining dakong kadaugan, agud sa paghinumdum sang kahamot sang mga handumanan kag makaangkon sang oportunidad sang paghangup nga, subong mga tumuluo ni Jesu-Kristo, kami tanan mangin sa presensya sang Dios sa mismong punto sang pagkabanhaw. Kay nagapasalamat kami sa Imo nga si Jesus

nagsiling didto sa lulubngan, “Ako ang pagkabanhaw kag ang kinabuhi; ang bisan sin-o nga nagatoo sa Akon magakinabuhi bisan pa nga siya mapatay.”

Mapasalamaton kami nga si Laura Kay ara na sa Imo presensya. Mapasalamaton kami para sa iya nangin kinabuhi diri sa kalibutan. Mapasalamaton kami para sa pamatuud sang pagluwas nga grasya, buhi nga grasya, grasya sa tagumatayon, kag sang walay katapusang grasya. Gani, kabay pa nga ini mangin isa ka sagrado nga tinion sang amon mga kinabuhi nga maghunahuna, agud maghinumdum, kag magbinagbinag. Kag sa kay bisan sin-o nga ari diri nga wala kay Kristo, ini mangin oportunidad gid unta nga ginhatag para sa ila nga magsabat, kon ini amo ang ila handum kag ang Imo pagbuut.

“Gani, nahibal-an naton nga sa yadtong nagahigugma sa Dios, Iya ginhimo ang tanang mga butang sa pagpanghikot para sa ikaayo, bisan sa yadtong mga gintawag suno sa napat-ud na nga plano.” Hangkata kami pinaagi sa sini nga mga butang. Sa ngalan sang Hari sang mga hari kag Ginoo sang mga ginoo, kag bisan kay Jesu-Kristo nga amon Manluluwas. Amen.

Ini amo ang gin-edit nga sinulat nahanungud sa handumanan nga panimbahon nga ginhimo sadtong 9 Nobyembre 1998 ni R. B. Thieme, Jr., Pastor sang, Berachah Church, Houston, Texas. Ang kinorsitihan nga komentaryo nagapklaro sang kahulugan, may kaangtanan sa dalanon nga ginadiskusyonan karon, ukon nagapabinagbinag sang pagpakahulugan sang teksto nga gintudlo sa pagklase sa Bibliya nga mga pagtudlo. Ang mga nakarekord nga mga pagklase sa Bibliya nakahanda na nga walay obligasyon sa R. B. Thieme, Jr., Bible Ministries, Houston, Texas.

